

Frá ritstjóra

Markmið fræðilegs tímarits fagstéttar eins og *Tímarits félagsráðgjafa* er að vera hvati til að hugsa fræðilega, nýta fagfræðilega þekkingu og miðla rannsóknarniðurstöðum og vísindalegri þekkingu í þágu starfsins. Fagstéttir eru misjafnlega langt komnar í þessum efnum og leggja á það mismikla áherslu. Fagið okkar á sér rætur í mannúðarhyggju og mannkærleika, en það byggist jafnframt á hugmynda-grunni upplýsingastefnu og velferðarsamfélags um félagslegt réttlæti og jöfnuð ásamt kröfum um skipulag (lög og reglur) og skilvirkni. Það fyrrnefnda vísar til mannréttinda og virðingar, en hið seinna vísar til hlýðni við yfirboðara og kröfu um afköst. Þetta tvennt virðist í fljótu bragði ekki geta samræmst, en í rýminu þarna á milli er vettvangur til að skapa þekkingu og beita henni til valdeflingar í starfi og vinna þannig gegn slíkri tvístrun. Ef þetta rými er of þröngt verður ekki vöxtur í faginu. Þá skortir möguleika til að hugsa, rannsaka og skrifa.

Forsendurnar til að skapa þetta rými – og víkka mörk þess verða ekki fundnar hjá yfirvaldinu. Þær liggja í menntun fagstéttarinnar, hjá fagmanninum sjálfum og í orðræðu faghópsins. Menntunin skapar undirstöðuna til að sjá samhengi hlutanna, geta greint fyrirbæri, tileinkað sér gagnrýnið viðhorf og vera fær um að tjá reynslu sína bæði í mæltu og rituðu máli, á móðurmálinu og erlendum málum. Ritfærni og tungumálakunnátta eru lykill að miðlun hugsunar og skoðanaskipta. Fagmaður sem rís undir nafni hefur sjálfur vitund og þor til að rækta þessar forsendur. Orðræðan í faghópnum er tæki til að efla þá vitund.

Hlutverk *Tímarits félagsráðgjafa* er að leggja hér lóð á vogarskálarnar, m.a. með því að gera kröfur og setja gæðaviðmið um innihald og form, málfar og framsetningu. Í því felst að örva áhuga og getu faghópsins til að miðla reynslu, niðurstöðum rannsókna og móta faglegra umræðu á sannfærandi hátt. Tímaritið á að endurspeglar stöðu og áskoranir faghlutverksins og brennandi samfélagsmálefni. Þessi vettvangur er tæki til að sýna það sem er á döfnni í faginu, vekja um það umræðu og styrkja um leið samkennd og samstöðu til að víkka mörkin – svigrúmið til faglegrar þróunar. Þannig má leggja af mörkum í sífellt fleiri málaflokkum og sérsviðum og styrkja um leið faglegt umboð greinarinnar.

Einn liður í því að ná þessu markmiði er að tíma-

ritinu berist nógu margar vandaðar og vel skrifaðar greinar svo að hægt sé að velja úr þeim og byggja upp heildstætt efni. Flokkunin í ritrýndar og almennar greinar er liður í þessu. Að þessu sinni hafa tvær greinar borist sem standast ritrýni. Báðar varða hagsmuni barna. Grein Írisar Eikar Ólafsdóttur er um börn og fangelsisvist, en grein Maríu Gunnarsdóttur og Anníar G. Haugen fjallar um barnaverndarúr-ræðið tilsjón. Ánægjulegt er að nú eru birtar sex almennar greinar. Þær spegla þjónustuþróun í félagsráðgjöf og snerta bæði æviskeið og sértæka málaflokka. *Samfélagsumræðan*, í umsjón Þrastar Haraldssonar og Halldórs S. Guðmundssonar, fjallar um brennandi málefni líðandi stundar á gagnrýnin hátt. Að þessu sinni er kastljósinu beint að félagslegum ójöfnuði og hvernig hann horfir við félagsráðgjöfum á vettvangi. Umfjöllunin um nýjar bækur er umfangsmeiri nú en verið hefur enda um stór ritverk að ræða. Pistlar og fréttir frá FÍ eru á sínum stað.

Viðbrögðin við síðasta hefti voru einkar jákvæð og ekki síst vakti grein Steindórs Erlingssonar vísindasagnfræðings um lyfjaiðnað og geðheilbrigði mikla athygli. Væri fengur að efni frá fleiri höfundum utan faghópsins. Í ljósi þess sem sagt var hér að framan hvetur ritstjórn til þess að félagsráðgjafar leggi fram fleiri greinar og stendur aðstoð við frágang handrita til boða. Í undirbúningi er að gefa út þemahefti *Tímarits félagsráðgjafa* þar sem fjallað verður um geðheilbrigðismál frá ýmsum sjónarhornum. Efni frá nýafstöðu málþingi Félagsráðgjafafélagsins um þau mál verður væntanlega birt þar. Er þess vænst að félagsráðgjafar á geðheilbrigðissviði nýti sér tækifærið og kynni verkefni sín í því hefti.

Áætlað er að tímaritið og fagfélagið endurtaki námskeiðin um ritun fræðigreina og um ritrýni á næstunni.

Sigrún Júlíusdóttir, ritstjóri